

那文毅公奏議

那文毅公籌畫回疆善後事宜奏議卷七十七目錄

卷七十七

議定外夷貿易規條

附糾彈

澄清積弊

議立茶稅

附請設三城銀庫並經管章程

那文毅公籌畫回疆善後事宜奏議卷七十七

男
容安恭輯

議定外夷貿易規條

附糾彈

道光八年八月初三日會同叅贊大臣固原提督
楊公芳喀什噶爾叅贊大臣武公隆阿

奏爲遵照伊犁建立貿易亭開設官舖控馭外夷通
商杜弊事竊查內地茶葉大黃磁器綢緞等項爲
外夷所必需前因安集延等助逆滋事種種不法
已奉

旨嚴禁卡倫斷絕貿易在案茲緣布噶爾巴達克山等

部落俱在浩罕之外商販往來均必由浩罕經過而各該部落均以貿易爲生今不准浩罕通商別部落亦因而需用缺乏計浩罕震懾

天威其勢不能不款關恭順求通貿易惟從前外夷與口內商民私相授受漫無覺察以致安集延等盤踞各城漁利作奸釀成巨案倘仍循故轍散漫無稽實非控制之宜且令各外夷不知

天朝法度致生輕忽查伊犁外界哈薩克部落向設貿易亭每遇易換棉花布疋等物均由將軍派員彈壓交易不准私相售賣立法極爲周密深得馭邊

之宜茲喀什噶爾葉爾羌地臨極邊卡外皆布魯特遊牧布魯特之外四通各外夷邊要情形較伊犁爲喫重則外夷通商亟應預籌辦法查喀耶圭卡倫通浩罕大路距該卡八十里有明約洛地方向係舊設卡倫處所去大城一百餘里地居要隘應於該處設貿易亭一處將堡卡修展派都守一員帶兵二百名足資彈壓稽查一切貿易均照伊犁官舖章程辦理查伊犁官舖係該處駐防各營借餉開設每年專員入關置貨一切食用等物均係自行置買藉以調濟各營茲既設立貿易亭則

外而稽查夷商濶跡盤踞內而約束奸商牟利勾串必須開設官舖得以鈐制出入操縱自我嗣後遇有外夷販貨到卡先由坐卡官弁稟報叅贊衙門派委委員酌帶官兵數十名前去卡倫外點明人馬牛羊及駝包數目押赴貿易亭另委明幹大員將內地商民人數貨物點明帶往督同該處守備在貿易亭彈壓并仍派妥幹大伯克帶領通事及易貨回子亦點明貨物人數一同前往不許差前落後以杜私通按貨公平議價所有民回均須請領印照方准赴貿易亭交易交易畢點明人

馬數目原派彈壓之人押帶出卡不准停留一人
各民回商販亦點明人馬數目原派之官員伯克
帶同照票銷差倘有故違及從中舞弊一經查出
照軍法治罪再回疆六十餘年歲出兵餉幾至數
千百萬雖有買賣仍攜入關者究屬無幾而外夷
以皮張等微賤之物易去者大半嗣後貿易各物
惟當議定價值以貨易貨永禁內地元寶不許出
卡庶商販流通內地精華仍歸內地商民回子中
有以銀置貨者查出其所置之貨概行入官仍將
該商民回子從重治罪如此籌辦實於

國計大有裨益至開設官舖成本需用銀六萬兩臣等悉心核酌不值請動正項查有前此抄獲各城安集延固積私茶共六萬一千餘觔合計得銀五萬兩作爲官舖成本俟本處城工及支發各處修城開渠各項清釐完竣下餘叛產無論多寡悉歸官舖按年所得餘息除去人工伙食照息多寡以六分攤給喀什噶爾英吉沙爾換防滿漢官兵以三分貼補各官辦公以一分存作衙署兵房歲修之費至葉爾羌一城亦應設立貿易亭官舖照喀什噶爾辦理一面咨行該大臣等辦所有西四城

防兵均足資津貼行之數年著有成效東四城防
兵無多亦可籌計撥給前此松筠奏陳南路換防
官兵請照西藏換防例辦理復經長齡議奏以所
用過費而回疆諸物昂貴應請酌量增餉第查

國帑有常一經議增邊餉遂成經費年復一年終非

長久之計

臣

等熟籌官舖每年餘款堪以調劑防

兵所有長齡等前奏應毋庸議至議開官舖成本
既非正款且每年羨餘不能預定應請每年終由
叅贊大臣將收獲餘息具奏一次以杜侵蝕應毋

庸報部核銷謹

奏

道光八年九月初三日奉

上諭那彥成等奏請照建貿易亭控馭外夷通商杜弊
一摺喀什噶爾葉爾羌地臨極邊卡外各部落商販
往來均必由浩罕經過該部落皆以貿易爲生未便
因禁絕浩罕不與通市而令恭順各部落生計缺乏
茲據該督等查明要隘處所請照伊犁與哈薩克貿
易章程辦理係爲因時制宜起見著照所請於喀耶
圭卡倫外明約洛地方建設貿易亭修展堡卡派都
司守備一員帶兵二百名前往彈壓稽查一切貿易

置貨均照伊犁官舖章程辦理惟所奏嗣後貿易各物當議定價值以貨易貨永禁內地元寶出卡商民回子中有以銀置貨者一經查出將所置之貨概行入官仍從重治罪果能如此辦理自係籌邊良法但恐有名無實日久玩生嗣後該大臣等總當認真查禁永遠遵守毋任玩法滋弊餘俱照所議行

道光八年十一月初三日會同喀什噶爾叅贊大

臣武公隆阿

奏爲布噶爾夷商入卡求通貿易照奏定章程辦理事竊查外夷各部所向藉貿易爲生臣等前奏設

立貿易亭及官鋪并議定稽查彈壓章程節次具

奏仰蒙

聖明允准在案並奉

諭旨喀什噶爾葉爾羌地臨極邊卡外各部落商販往來均必由浩罕經過該部落皆以貿易爲生未便因禁絕浩罕不與通市而令恭順各部落生計缺乏茲據該督等查明要隘處所請照伊犁與哈薩克貿易章程辦理係爲因時制宜起見著照所請於喀郎圭卡倫外明約洛地方建設貿易亭修展堡卡派都司守備一員帶兵二百名前往彈壓稽查一切貿易置

貨均照伊犁官鋪章程辦理惟所奏嗣後貿易各物
當議定價值以貨易貨永禁內地元寶出卡商民回
子中有以銀置貨者一經查出將所置之貨概行入
官仍從重治罪果能如此辦理自係籌邊良法但恐
有名無實日久玩生嗣後該大臣等總當認真查禁
永遠遵守毋任玩法滋弊餘俱照所議行欽此欽遵
在案伏憶臣那彥成去歲冬間出京時松筠向臣
告知不准浩罕通商原因其向來傲慢又復助逆
至於布噶爾巴達克山等部落向來恭順卡內回
衆所需該等處貨物爲多能令布噶爾等處通商

於回衆大有裨益等語

臣

再三斟酌松筠此語實

屬見識老到

臣

當虛心記辦到喀什噶爾後密令

伊薩克遣可靠回子熟悉道路之人潛往布噶爾

諭以爾布噶爾地方向來恭順此時嚴禁茶黃係

專不准浩罕貿易與爾部落無干爾部落願來者

在所不禁密諭去後茲於十月初三日據奈曼愛

曼四品頂翎布魯特比阿布都熱依木稟報有布

噶爾夷人聲稱要到喀什噶爾貿易該夷商一行

共十餘人所帶貨物二十餘駄到我們愛曼我們

不敢擅令過去先行稟報等語具稟前來

臣

等尙

恐浩罕夷人假充布噶爾藉辭入卡窺探倘誤中
其計轉爲所竊笑因先派令五品阿奇木伯克胡
魯班一同奈曼布魯特阿布都熱依木前往該愛
曼詳細查看據稟該布噶爾商夷係由達爾瓦斯
喀拉提錦一帶前來並未經由浩罕且據該夷人
稟我們布噶爾係接奉

欽差大人諭帖准我們進卡通商如果查出我們是浩
罕的人貨物情願入官將我們重重的治罪等語
隨於十月十五日派委叅將金和遊擊張作功酌
帶弁兵前往烏帕拉特卡倫查點該夷人馬馱包

數目與奈曼愛曼布魯特比阿布都熱依木所稟相符當卽押至距城四十餘里之托胡薩克回莊撥與舊倉一所住宿卽令金和等照料彈壓不許商民回子私自交往以防日久勾串至該夷等所易貨物照奏定章程祇准以貨易貨概不准以元寶交易復與臣武隆阿公同酌定官舖所存茶葉布疋等物易貨四分其餘六分准商民易三分回子易三分其商民回子交易之事俱派委妥弁及曉事伯克查明何人所易何貨分晰開單具稟一切價值聽商回自行議定官爲稽查彈壓不准該

東逗留亦不准商回潤迹至於貿易聽其公平交易官亦不爲之經理事畢派伊薩克等將商回點明帶回仍委金和等將該夷人貨物點明押送出卡此次通商辦理一切章程臣已面交武隆阿以後通商均可照此嚴密辦理至該夷商再三懇求謁見臣等查向來夷商來往原不值與傳見此次因係甫經弛禁通商藉以宣布

威德使該夷向卡外各部落宣揚俾咸知感畏當於二十日傳見該夷商等據稱我們布噶爾久沐

大皇帝的恩德我們地方以貿易爲生從前通商の時

候我們地方狠沾

大皇帝的恩典如今浩罕幫了張格爾獲罪不准通商
我們的買賣人都在他那裏住著貨物都攔下了
我們係從本處繞道從達爾瓦斯喀拉提錦來的
我們後頭還有百十多人因不得准信不敢前來
我們貿易完了趕緊回去教他們都來總求恩典
准我們仍照從前往來貿易等語當卽諭以
大皇帝深知爾部落恭順憐爾部落無辜被浩罕所累
爾等部落人民俱係

大皇帝的赤子

大皇帝以爾等不得通商爾處人民難於生理早有

恩旨命本大臣准爾等以後照常貿易據該夷商等伏地碰頭感激之誠形於辭色查該夷商土素邁瑪特米爾阿布都爾滿愛孜斯邁瑪特占等四人其土素邁瑪特米爾阿布都爾滿等二人神色安閒毫無商販齷齪之態密令侍衛同子愛孜斯伯克作霍爾頂等密向該夷商跟役人內查探始知該夷二人係布噶爾小頭目作爲商人藉探貿易情形臣等於接見時已覺其少異今雖查明亦未便識破復派愛孜斯等帶同該夷人等向新舊各城

聽其自買零星物件該夷見城郭雄壯兵民湊集
曾向愛孜斯等云

天朝於萬里外築城安兵不過吹噓之力實在可怕之
至等語復據稟稱我們布噶爾從前曾經進

貢求由巴達克山一路直赴葉爾羌從前大人們不知
如何辦理我們向來貿易總是走浩罕來時浩罕
抽稅回去時浩罕又抽稅實在被其所苦如今

大皇帝施恩准我們來我們仍求由巴達克山一路入
卡來回可免浩罕擾累我們全部都沾

大皇帝天高地厚的恩典了查嘉慶二十五年布噶爾

伯克色依特額密爾查達爾遣使進

貢並求由巴達克山一路至葉爾羌貿易前任叅贊大臣松福許其進貢照例筵宴酌賞緞疋并准令由巴達克山行走該夷使密圖瓦里等因回賞甚薄向松福前控訴并云我們所進之物值二百元寶喀什噶爾距北京甚遠何以六月進

貢七月卽回賞緞疋恐大人們未曾奏知

大皇帝如今仍求將我們所進之物給還我們等語旋令原任阿奇木額依莫爾奏集元寶數十錠給與該夷敷衍了事茲查該夷等所稟求由巴達克山

一路貿易情詞真切自係實在情形當同

臣武隆

阿悉心商酌允其所請諭令交易事畢不准停留

一人速回爾處招令各商卽由巴達克山徑赴葉

爾羌貿易一面行文葉爾羌辦事大臣照此次章

程妥爲辦理查布噶爾部落在浩罕西南該處十

七回城人民極富向來需用中國茶葉大黃綢緞

布疋及零星衣飾等物從前由浩罕經過來往抽

稅該夷實被苦累浩罕漁利坐收各部落貨稅歷

年已久浩罕得以把持而各部落純以貿易爲生

亦卽不得已已在浩罕上稅而布噶爾地方殷富人

亦稍強向來爲浩罕所畏今有噶爾距喀什噶爾
兩月程距葉爾羌亦兩月餘程今我

皇上施恩准令該夷由巴達克山行走該夷深感

皇恩從此浩罕自生疑懼亦且浩罕全憑貿易及抽收
各處貨稅少爲富足便敢夜郎自大現在既不準
通商復令各部落俱繞路前來使該夷無可牟利
自然頓失憑依從此不見信於各外夷其勢愈乖
實爲邊防要務臣已告知臣武隆阿各外夷俱准
貿易惟於浩罕則須執定主見斷不與甚好通商亦不
可與之決絕亦不遽與之通商不絕其冀幸之心

硃

則仰息於我不敢再生他念不俾之利權不久坐
令削弱總俟該夷三五年衰憊已極必令十分悔
罪將兵民商賈人等全行送出並將逆裔全數縛
獻再准通商方能永靖邊圉臣愚昧之見伏候

聖明指示遵行再以後布噶爾如仍由喀拉提錦一路
前來喀什噶爾貿易卽在托胡薩克回莊修建夷
館以資安頓如山巴達克山徑赴葉爾羌貿易該
處八十里亮噶爾業已奏設兵堡建有貿易亭夷
館足供棲止謹

奏奉

硃批所議甚是另有旨

道光八年十二月初六日軍機大臣字寄奉

上諭那彥成等奏布噶爾夷商求通貿易一摺前因卡
外各部落皆賴商販爲生未便因禁絕浩罕致令羣
夷生計缺乏特允那彥成等所請建設貿易亭照奏
定章程辦理現在布噶爾籲懇貿易該部落雖亦有
逆裔家屬潛匿在彼尙未如浩罕之公然助逆惟其
通市事尙可行惟必須認真查察不致令浩罕夷商
影射冒混方爲妥善若名爲禁絕浩罕而仍墮該夷
術中不但該夷不知儆懼轉爲他夷所竊笑現據那

彥成等查詢布噶爾夷商實苦於浩罕之剝削懇由喀拉提錦及巴達克山繞越前來悉聽其便但當時加訪察不得任其與浩罕狼狽爲奸致滋流弊此時立法之初派出稽察彈壓官弁伯克等或尙知奉公守法惟恐日久弊生殊於邊防大有關係著武隆阿額爾古倫伊薩克督率所屬實力奉行毋任稍滋弊端致肇邊衅

道光九年正月十二日會同喀什噶爾叅贊大臣武公隆阿

奏爲重申抽收外夷稅課定例永遠不准減免以符

舊制事竊查回疆自開闢以來奏定章程外夷貨物入卡貿易每三十分抽稅一分原非重科其要總在稽查出入而慎邊防並使名外夷稟遵

天朝法度不能任意出入立法本爲盡善嗣因安集延等盤踞各城內外勾串其始不過賄囑阿奇木代爲懇求以該頭人貨物酌量減免稅課歷任大臣不知大體轉以免稅爲羈縻外夷之計日久相沿遂致各外夷販貨入卡貿易者無不懇求免稅雖酌免多寡不一而陋習相仍視爲常事甚而從前浩罕貨物進卡經不知大體之人苟求無事畏葸

遷就全行免稅該夷因而夜郎自大出卡後不言
懇求優免轉稱喀什噶爾不敢抽收伊部落稅課
而且包攬別部落貨物一律請免從中漁利侵肥
藉以誇耀別部其情尤爲可惡在稅課無多原可
不計第使外夷罔知

天朝法度於大體殊有關係當茲立法伊始之時若不
重申定制嚴立章程則外夷陋習相沿又復希冀
免稅各大臣中倘有不知大體之人仍蹈前轍日
久益起外夷輕視之心相應奏明請

旨勅下喀什噶爾葉爾羌烏什各城大臣嗣後外夷販

貨到卡均遵照舊制每三十分抽稅一分無論何處部落概不准絲毫減免作爲定例如各城大臣有沽名市惠畏縮濫免之事叅贊大臣查出據實叅奏叅贊大臣如有減免外夷稅課情事准伊犁將軍及各城大臣據實叅奏均照違制例請旨交部嚴加議處似此嚴行禁絕庶各外夷妄念不生不失舊時控馭之法謹

奏

道光九年三月十一日奉

上諭那彥成等奏請重申抽收外夷稅課定例一招回

疆自開闢以來曾經奏定章程外夷貨物入卡貿易
每三十分抽稅一分原非重科特藉以稽察各夷出
入慎重邊防立法本爲至善乃近年以來各城大臣
往往因外夷懇求免稅卽量准減免且有全行免稅
者殊屬不知大體著通諭喀什噶爾葉爾羌烏什各
城大臣嗣後各夷入卡販易務當遵照舊制每三十
分抽稅一分無論何處部落概不准絲毫減免如各
城大臣濫行減免稅課著該叅贊大臣據實奏倘
叅贊大臣有減免情事著伊犁將軍及各城大臣據
實奏奏均照違制例交部嚴加議處毋得日久玩視

以肅法令

道光八年十二月二十八日會同喀什噶爾叅贊大臣武公隆阿

奏爲特叅玩忽奏定章程之將弁以肅

功令事竊查回疆從前諸事廢弛各卡倫任意出入以致安集延盤踞阿克蘇以西各城有數千餘戶漫無覺察日積月增殊有關係人數旣多因潛與張逆浩罕串通而白帽回子來往勾結以至釀成大事前經臣等嚴禁卡倫驅逐各城居住十年以內之安集延地方甫就肅清復因向來各卡外夷

人入卡貿易漫無覺察以致養奸成患並奏設貿易亭官舖詳定貿易章程俱奏明行知各城遵辦在案查前奏內開遇有外夷販貨到卡先由守卡官弁稟報本城大臣派員驗明人馬馱包數目押赴夷館安置傳示內地商人及買賣回子派員監令議價不准該外夷與商民回子私相授受交頭接耳間有懇請在同城巴襍爾買賣零星物件之人亦稟明派官及伯克監押不准與商民回子私相交涉交易事畢仍點明人馬馱包數目不准私自增減差前落後令原帶彈壓之人押帶出卡如

此彈壓管帶亦令外夷察知

天朝法度不敢輕視自無內外串通勾結之弊奉行日久可期又安乃據英吉沙爾領隊大臣多隆武該城城守營遊擊張作友派目兵鮑福押帶布魯特七名於本月十六日到喀什噶爾大城臣等以布魯特向無如此貿易之人因諭令伊薩克詳加盤查據稱並非卡外貿易之布魯特係巴達克山的夷人當將交易各事照奏定章程派守備常殿勳帶弁兵數名同子伯克作霍爾頂帶領同子十餘人稽查彈壓交易事畢押令出卡訖一面飭查該

夷人所進之烏魯克卡倫該卡倫外委冶浦章稟
報既係巴達克山夷人何得認爲爾魯特僅派兵
一名送至英吉沙爾由該城復派兵一名帶至喀
什噶爾全未遵照飭行奏定章程辦理實屬玩忽
隨將遊擊張作友及卡倫外委冶浦章劄調來城
訊問據冶浦章供稱本月初十日有夷人七名馱
馬五匹共騎馱馬十二匹到卡聲稱係比塔什罕
的布魯特要往喀城貿易當撥兵一名押赴英吉
沙爾據張作友供稱本月十二日據卡倫稟報稱
係布魯特遊擊未能查出是巴達克山的夷人實

在糊塗求嚴叅治罪各等語查該遊擊張作友派充英吉沙爾城守營遊擊所有卡倫交涉外夷出入貿易等事是其專責無論布魯特巴達克山夷人均應訊問明白遵照奏定章程妥協辦理乃既未具稟叅贊亦未派委妥幹員弁同子押赴喀什噶爾率撥兵一名押帶來城似此玩忽非尋常疎忽可比誠如節次所奉

諭旨但恐奉行不善又成具文且甫經具奏奉行臣尙在喀什城乃竟不以事爲事似此立法之初任意自由處處界臨外夷所謂邊防者安在若不嚴加懲

辦無以示儆所有遊擊張作友應請

旨降爲守備以觀後効卡倫外委冶沛章應請革去外委降爲馬兵示懲領隊大臣多隆武甫經到任情形不熟惟失於覺察亦難辭咎請

旨交部於任滿回京後議處至該城阿奇木邁瑪特瑪哈素特係伊斯堪爾之孫前任郡王玉努斯之子忠盡後裔堪以造就前經奏補英吉沙爾四品阿奇木於巴達克山夷商入卡漫無覺察殊屬非是應請撤回與喀什噶爾四品伯克斯底克對調交伊薩克隨時教導俾之學事其張作友所遺英吉

沙爾城守營遊擊就近委署甘肅寧夏鎮玉泉營
遊擊員缺臣另行遴員請補謹

奏

道光九年二月初一日奉

上諭那彥成等奏叅玩忽奏定之大臣將弁一摺英吉
沙爾城守營遊擊張作友於巴達克山夷人入卡貿
易誤認爲布魯特且僅撥兵一名押送並未遵照奏
定章程辦理殊屬玩忽著降爲守備卡倫外委冶沛
章著降爲馬兵領隊大臣多隆武失於覺察著交部
於任滿同京後議處該城四品阿奇木邁瑪特瑪哈

素特亦著撤回與喀什噶爾四品伯克斯底克對調
以示懲儆

澄清積弊

謹按道光八年四月十九日奏內

奏查陋規一節烏什回戶無多地方較小各該衙門止於供送柴水尙無格外勒索情事該處十二回莊各伯克應役使燕齊回子人等該一城亦無逾額情弊同情亦甚質樸講求水利農功頗稱樂利謹

奏

道光八年七月初三日會同叅贊大臣固原提督楊公芳喀什噶爾叅贊大臣武公隆阿

奏爲查明各城大小衙門及伯克等相沿陋規勒石
永禁事竊思上年張逆滋事西四城從逆猖獗實
係同衆苦於阿奇木伯克等苛斂而阿奇木之所
以攤派多由大小各衙門供支浩繁攤派斂錢藉
辦公之名又復指稱中飽肥其囊橐臣那彥成仰
蒙

簡命自入回疆卽留心採訪隨時密記又復咨查各城
大臣令其據實咨復今俱詳報前來臣等公同核
訪大概相符查東四城回戶較少各大小衙門陋
規不過供給柴薪苜蓿夏令搭蓋天棚年節餽送

硃

食物或官價採買市物或額設工匠當差此數條已屬有干例禁而西四城之擾累月增歲積有加無已其尤甚者如每月由阿奇木在於各同戶名下按戶派紅錢二十五文名為克列克里克如有施恩不究者曰不枉過將來又復如故無怪乎一夫不逞萬夫響應喪心昧良深堪髮不數再行續派以所用之多寡按戶均攤錢無定數名為色里克其各衙門服食日用所需無一不

指費非公忠體國之大臣執尚和盤托出可嘉之至

取給於阿奇木雖有發價之名並不發價從前喀城每月費紅錢五六百串至七八百串不等葉城每月費紅錢七八百串至千餘串不等和城每月費紅錢一百五六十串至三百串不等甚至各城

於月給供應之外尙有隨時需索海龍水獺骨種
羊皮珊瑚黃金綢緞茶葉金花布搭連布等物遇
有差使過境索取車價元寶二三十錠紅錢一二
百串尋常宴客所用海菜及頑耍技藝賞犒各款
均出克列克里克色里克之內大小衙門相習成
風阿奇木伯克等又復指名加倍苛斂有因無草
遂成相沿陋規必當嚴行禁絕第此時事隔久遠
受者既非一任子者又非一人且按年賬目全被
燬燬無從質証而此等劣款因人增減所有陋習
相承總宜勒石永禁惟有逐細奏明請

旨嚴行飭禁現將查出南路八城各大小衙門及阿奇木衙門陋規分別條款或此有彼無或此多彼少各款大率相仿經此次奏明永遠革除之後倘章京伯克等違禁擾累該管大臣奏明嚴辦若瞻徇容隱經叅贊大臣查奏該管大臣照例議處各城大臣得受已禁陋規或改易名目仍有侵擾叅贊大臣奏明叅辦照乾隆年間格綳額之例卽行正法所有濫應中飽之阿奇木等亦予正法叅贊大臣不能潔身表率干犯禁令及徇庇各城大臣有犯不舉伊犁將軍訪查叅奏並准各城大臣指實

硃

看去似原不如此不足示戒

揭察如此交相稽核自可嚴密况各城大臣及章
京等均仰沐

殊恩加增養廉鹽菜銀兩

臣

等復於新增糧石內酌量

津貼似已足敷辦公不致稍有藉口大小

臣

工具

有天良咸知凜惕從此大法小廉於回疆地方可
冀漸就休息所有裁革陋規條款謹繕告示清單

恭呈

御覽謹

奏

爲裁革各城官員伯克陋規勒石永禁以除擾累

事照得回夷各部落從前爲準噶爾所虐幾不聊生蒙我

高宗純皇帝命將出師勞來安集戡定回疆入城薄賦輕徵咸欣樂利迄今七十年回衆忘準部之欺凌徂於派罕巴爾後裔之煽惑頓蒙反側實由於各城大小官員伯克腹剝脂膏日甚一日是以激而生變茲首逆張格爾業已生擒衆心帖然向化本大臣奉

命前來辦理善後以興利除弊護養回衆爲先務訪查各城大小衙門及伯克等相沿陋規名目不一或

此有彼無或此多彼少無一非擾累同子之事而
西四城爲尤甚在官員不知檢束視爲積習相沿
伯克等乘機漁利苛斂橫徵不可枚舉實堪痛恨
當茲查辦之初但留一項陋規名目卽啟後日影
射擴充之漸現已分列條款奏明永遠革除勒石
裁禁俾回衆咸知

大皇帝惠愛遠夷不忍絲毫刻剝此後大小各衙門如
有陽奉陰違或轉生別項名目擾累苛派者准各
回戶在將軍叅贊前告發將該大臣及阿奇木等
一併奏明嚴辦須至禁止者奉

硃批好

各城大小衙門陋規

一西四城大小衙門一切日用所需及各項匠役工價口食並來往差使準折馬價及大小衙門各項公私人役使費所費甚多阿奇木伯克於所屬各回莊回戶名下攤派而阿奇木等藉公用之名多攤苛斂從中肥己且阿奇木以下諸人層層剝削以致每月每戶派紅錢二十五文謂之克列克里克復因克列克里克不敷又按每戶分派色里克派至色里克則錢無定數有

多無少此係西四城第一陋規應永遠革除如
敢改易名目仍有擾累卽奏明請

旨將各城大臣照枉法贓辦理將阿奇木一併嚴行治
罪

一向來大小衙門購買一切衣食等物派阿奇木
買辦均有相沿官價查官價已較民價爲少向
來各大臣因阿奇木懇求情願墊辦遂至概不
發價嗣後各大臣遇有買辦各物永不准派令
阿奇木伯克代買大小各衙門悉應照市價派
家人自行買辦發價倘仍蹈故轍該叅贊大臣

指名叅奏照枉法贓辦理該阿奇木亦一體治罪叅贊大臣倘竟故違應聽伊犁將軍查明叅辦亦准各城大臣據實揭叅一體治罪

一西四城各大臣司員每年所得養廉鹽菜儘敷用度乃查有派令阿奇木購買珊瑚黃金各色皮張等款價值昂貴而各大臣司員以派爲名竟係向阿奇木索要阿奇木藉端多攤肥已有增無減前項物件並非急需嗣後大小各衙門永不准買置違者從重治罪

一各城大小衙門應差一應工匠各項人等無論

有無工作均有阿奇木按日發給口食各回戶
圖避克列克里克等差徭賄屬通事毛喇等影
射投充各衙門工匠以致年例應納官糧亦邀
寬免而正額錢糧悉分攤各窮回名下補足嗣
後各該衙門遇有大小工作悉令自行發價僱
覓工匠並不准由阿奇木發給口食影射投充
之弊永行禁止官糧亦可均勻交納窮回可免
擾累以後大小衙門如仍私設應差工匠致糧
賦攤累窮回許回子指實控告奏明叅辦該阿
奇木亦一併治罪

有遇阿奇木呈遞時故作辭却復授意私人轉告阿奇木將所遞之物一一折價尤爲貪詐可恨嗣後阿奇木呈遞博勒克及回京盤費當永遠禁止大臣違例收受甚至折價婪索察贊訪查叅奏卽行正法餽送之阿奇木一併從重治罪

一各城司員中往往向巴襍爾廣爲收買瘦馬仍係阿奇木供支草料至臙壯時作定重價交阿奇木變價每匹紅錢五千文至十餘千不等又有收受塔爾糖積至數十枚亦隨意作價交阿

奇木變價此等貪鄙無耻之事半係口外駐防
所爲尤爲外夷所輕嗣後派令阿奇木官價買
辦物件及託阿奇木代買物件之事永行禁止
違者從嚴察辦阿奇木代買代賣亦從重治罪
一各城烏拉馬匹不能不用此後各城酌量派定
烏拉馬匹數目遇事調用不准臨時濫派而騎
用烏拉馬匹亦須向叅贊各大臣發給印票方
准應付以杜影射苦派之弊

一各城駐防司員往往藉差人回籍遞信私派烏
拉馬匹每匹折紅錢十二千文至十五千文不

等所派之馬並無定數每月一兩次不等回子
烏拉亦係官馬以官馬遞家信已屬有干例禁
况又折價肥已尤爲可恨嗣後出派烏拉馬匹
非奉有叅贊及各本大臣印票無論何城何莊
大小回子均不得濫行應付如司員有朦混私
派勒折馬價情事本管大臣嚴叅治以應得之
罪

一各城派員巡查卡倫及遇有各莊相驗等事向
亦有私派烏拉馬匹折價之弊嗣後遇有前項
差使應由各城大臣先行發給印票註明騎馬

若干匹作爲定例倘有例外增派折價各該大臣查明叅辦治罪

一和闐所屬開雅爾等六城該大臣例應巡閱每遇巡閱之時各該城阿奇木餽送花緞花紬花布皮張之外尙有黃金元寶如開雅爾一城大臣黃金四十兩家人及隨員筆帖式各有餽送至書吏通事等均有紅錢二三十千文不等和闐情形較各城殷實陋規是以較豐查和闐回情較別城爲馴良似此假巡閱而增婪索此等劣員亦不足以彈壓稽查實係有虛名而受實

害以後巡城之例應永遠停止如有藉端巡閱
得受已禁陋規叅贊大臣查明叅奏卽行正法
以示炯戒

一喀城叅贊幫辦大臣蒞任所屬各城阿奇木向
均遞送馬匹收受後作重價發阿奇木變賣阿
奇木分派各回莊領馬繳價窮苦回子力難措
償甚有押追比責之事嗣後叅贊幫辦大臣不
准發馬變價違者照枉法贓治罪阿奇木逢迎
領變亦一體治罪

一喀城大臣衙門向來採買狐皮每張發紅錢三

十五文羊皮每張發紅錢五文不敷之價係阿奇木暗中賄貼賠項不止數倍一歲採買數千張司員筆帖式又復乘機效尤所費不貲阿奇木不能不攤派回戶實係擾累嗣後大小衙門購買皮張均按市價給發不准阿奇木暗中賄貼如該大臣仍前短價採買阿奇木見好牟利准各回戶告發均照枉法贓治罪

一阿克蘇之拜城產鷄庫車之沙雅爾產梨均爲回疆物產著名之區不特本城大臣例有供應卽於各城大臣均有餽送舊規該城阿奇木藉

端誅求作爲年例實屬滋擾嗣後責成阿克蘇庫車各大臣諭飭各該莊阿奇木永遠裁革

各城阿奇木陋規

一各城阿奇木伯克伊什罕起至五六七品伯克均例有燕齊回子查三品阿奇木例設燕齊回子八十戶以次遞減各城大小伯克額設燕齊不一均有奏案近因相沿日久任意增至數百戶每戶祇納該伯克年例藉免官差徭役其本身應納官糧分攤各回戶名下補交該阿奇木等惟利是求其私自充補者皆係熟知富戶富

戶漸貧又指換殷實之戶回衆貽累無窮嗣後
應按照乾隆年間定額永遠遵行每屆年終由
阿奇木查明有無私增私換呈報大臣衙門存
案阿奇木隱匿不報及各大小阿奇木呈報不
實應歸各大臣叅辦並將現在各大小城阿奇
木以下各員名下私充燕齊回戶造冊呈報逐
細清釐不准私增私換令各歸本城莊當差以
杜朦混則交糧回戶旣多窮回自免擾累如有
逾額役使燕齊者准回戶指控該城大臣將該
伯克等照枉法贓從嚴治罪

一喀城叅贊幫辦大臣向來巡閱卡倫阿奇木派調闔屬城莊烏拉馬匹乘騎無多大半皆係折價藉爲沿途支應及內外當差人等襍費此項另作攤款在克列克里克色里克之外自應指實裁革嗣後叅贊幫辦大臣巡閱卡倫需用馬匹卽在額設烏拉馬內給予印票傳調不准阿奇木藉巡卡之名私自派調亦不准令阿奇木給予隨從人等襍費如查有阿奇木影射派調情弊卽據實奏明從重治罪

一各城阿奇木每遇年班展

觀之期籍進

貢之名攤派同衆其實例

貢不過小刀葡萄瓜乾等物原非貴重之物該阿奇木等將所斂錢文置辦皮張金線及土產貨物內地驛站如失一包一囊該伯克等指稱

貢物種種詛詐經過各地方官不勝其擾迨至到京後貨物銷售又復置辦綢緞茶葉各物販至回疆售賣漁利是

天朝驛站年年與回子遞送買賣尤爲不值當茲立法之初應首先嚴行申禁且每屆班期四品以下

伯克俱係阿奇木點派其中亦有請託迨至派定各於城莊攤派誅求無微不至甚至每戶派烏拉馬若干匹折紅錢二千文至十五千文不等其苛斂倍於各大小衙門陋規應永遠禁止嗣後遇有年班四品以下伯克亦按定班期由各大臣點派不得任意混淆尤不得藉進

貢之名橫加聚斂及濫派烏拉馬匹倘有不遵准回戶等赴大臣衙門控告照枉法贓治罪如此明立科條不但回戶得免擾累內地驛站亦可無年班伯克騷擾之弊

卷一百一十一
三
一各城阿奇木伊什罕等伯克得項最優足敷養
贍又復貪多無厭其本身地畝應用牛具人工
均攤派窮回耕種回疆地畝寬濶如百畝分三
年種藝所謂歇二種一阿奇木等伯克利其歇
地亦派令回夫自攜牛具耕種秋收入已此等
貪劣宜通行申明永禁俾窮回得以休息如該
伯克等仍敢派撥牛具回夫該管大臣查出及
回子告發從重治罪

一阿奇木伊什罕伯克等田土旣富所收糧石頗
稱豐足每秋糧入市之前把持市價不准窮回

糶賣始至各伯克等糧石糶足始准窮回入市窮回隱痛吞聲不敢與阿奇木等較量極爲可憐嗣後秋糧入市先儘窮回阿奇木等永遠不准把持市價苦累窮回違者准回戶入城喊控查明治罪

一西四城阿奇木到任凡動用什物如絨毡花氈銅錫木磁等器皿無不周備無遺計其所值爲費不貲而皆攤派於所屬回莊實屬擾累茲各項陋規業已一律革除嗣後阿奇木到任不准派累回莊供備動用什物器皿違者該管大臣

查明治罪

一各城大小伯克到任均呈遞阿奇木馬匹並餽
送金絲緞及皮張綢布等物今回疆博勒克業
已奏明裁禁嗣後大小伯克到任不准再向阿
奇木呈遞馬匹餽送禮物違者該管大臣查明
治罪

以上大小衙門各款阿奇木等各款均係劣跡
昭著擇其尤甚者請

旨勒石永遠革除一勒各城大臣衙門一勒各城阿奇
木衙門通行刷印分貼各莊俾回衆共得明白

知曉並令各城大臣按季查核有無干犯例禁
之人報叅贊衙門叅贊大臣每年終彙奏一次
庶大小官員及伯克等有所凜畏各勵廉隅仰
副

皇上柔遠懷徠之至意則回衆安居樂業永享昇平之
福奉

硃批所奏甚是另有諭旨

道光八年八月初七日奉

上諭那彥成等奏裁革各城陋規條款一摺所奏甚是
回疆各城大小衙門一切需費繁多阿奇木伯克等

往往藉辦公之名向各回戶攤派苛斂從中肥己據
那彥成等查明相沿陋規分別條款或此有彼無或
此多彼少其尤甚者每月按戶派錢名爲克列克里
克如有不敷再行續派名爲色里克似此行同饕餮
殊出情理之外若不嚴行禁絕何以安回衆而靖邊
陲著照那彥成等所議卽將前項擾累之事勒石永
遠革除一勒各城大臣衙門一勒各城阿奇木衙門
通行刷印分貼各回莊明白曉諭並令各城大臣按
季查覈有無干犯例禁之人報明叅贊大臣每屆年
終彙奏一次至伊犁將軍統轄各城尤當破除情面

認真查察倘章京伯克等違禁滋擾該管大臣奏明
嚴辦若瞻徇容隱經叅贊大臣查奏卽將該管大臣
照例議處各城大臣或受已禁陋規或改易名目仍
有侵削叅贊大臣奏明叅辦卽照乾隆年間格綳額
之例立行正法所有濫應中飽之阿奇木等亦予正
法若叅贊大臣不能潔身表率干犯禁令及徇庇各
城大臣有犯不舉著伊犁將軍訪查叅奏並准各城
大臣指實揭叅如將軍有瞻徇容隱情事別經發覺
除將不法之員治罪外定將該將軍一併嚴懲决不
寬貸至各城回子如有受該處大小官員賂削者准

其赴叅贊將軍各衙門呈控如該衙門不爲究辦卽於年班進京時赴理藩院呈控倘理藩院仍不代奏准其赴在京各衙門控告如所控得實免其坐罪其申訴不實或未經在叅贊將軍等衙門呈告者仍照例治以誣告及越訴之罪自此大明定章程各城大小臣工務當各矢天良潔已奉公毋得仍蹈前轍致干咎戾將此通諭知之

道光九年三月初五日會同喀什噶爾叅贊大臣
武公隆阿

奏爲查明回疆兵民商回有干例禁各條出示永禁

事竊查回疆地屬外夷諸事不甚講求是以愚回犯法而不知兵民伯克人等恃強倚勢任意欺凌愚回受累而無告方今疆圉乂安回情樂利正當明立科條使回子遷善遠罪其兵民伯克等有欺虐回子致令隱忍難堪者亦各予以嚴懲俾人人皆知畏法惟不逐款奏明則奉行不力事過卽不復問徒有章程於治理依然無裨今將陸續訪聞或因事查明向來陋習彙繕禁約十六條恭呈

御覽請

旨勅下各城大臣於每年開印後將應禁事宜譯寫簡

明回字告示多張實貼城莊務使周知遇有干犯

據實究辦俾知炯戒

硃

一回是疆各營須用硝磺向令回子採辦交納並不

查禁私磺私硝前年收復葉爾羌搜獲火藥七

十餘缸明係採辦交官時私行藏匿應嚴行示

禁嗣後各城查明產磺處所派兵巡防遇採辦

之時專委營員督率不准偷漏隱匿其硝觔只

准回子掃取硝土交官各營自爲煎熬如有私

採私熬訪獲到案將該回子照例治罪並治該

管伯克以失察之咎

一私藏軍械私造烏鎗軍器久干例禁西四城當
用兵之後撙棄軍械甚多業據節次呈繳但恐
愚回無知未能收繳淨盡應嚴行示禁並予限
三箇月責成各城阿奇木逐戶搜查呈繳貯庫
嗣後如查有私藏軍械及私造烏鎗軍器之戶
將該回子照例治罪並治該管伯克以失察之
咎

一回鑄產銅不旺不能加卯鼓鑄錢文以每年額
鑄錢數計之如無私燬情事則逐年增多錢布
日見充裕現又添鑄當十錢文行使更臻便利

錢背已鑄明年分以杜官收減鑄之弊第恐商
回私燬私鑄於錢法仍屬無益應嚴行示禁嗣
後責成各城臺市營員並阿奇木嚴密訪查如
有私燬私鑄照例究辦

硃

是

一回俗阿渾爲掌教之人凡回子家務及口角爭
訟事件全憑阿渾一言剖斷回子無不遵依必
需慎選得人常以正言教導回子自皆羣趨於
正不敢相習爲非但近年以來均係阿奇木狗
情舉充以致阿渾任意剝削無所不至尤爲隱
患應嚴行示禁嗣後責令阿奇木遇有阿渾缺

出由各莊伯克同子查明通達經典誠實公正
之人公保出結聽候阿奇木稟明各大臣點充
伯克人等不准徇私濫保阿奇木不准任意挑
剔仍於每月朔望阿奇木帶領阿渾至大人衙
門叩見日久熟認內有何人不可靠不知經典
化導無方刻剝回戶者卽行懲革原舉之阿奇
木伯克等一併叅辦

硃

是

一從前各城回子出境並無稽考以致任意出卡
與外夷勾結但查舊日章程各城回子或貿易
營生或奉公差遣或出外傭工均報由阿奇木

呈請本城大臣給予路票將年貌及因何事赴何城何日前往酌量地方遠近限定日月限亦不得過一年分晰註明沿途臺卡照驗放行一面咨明各城大臣查照到日繳銷路票交阿奇木登記冊檔隨時稽查回日卽在該城大臣衙門請領回照亦查明該回子年貌與何事何地方幾時限期咨行原城查考如係貿易傭工不能卽時回歸者各城於年終查明彙咨各回子原籍設有抗欠賦役情事以憑咨提倘領票在途逗遛日久查明窩留之人究辦或並未領票

任意往來訪獲到案并該回子從重治罪其無票出卡者卽照私越開齊例治罪自克復四城之後各城均已一律辦理第恐日久生懈應嚴行示禁嗣後責成各城阿奇木及該管伯克實力奉行如臺卡員弁查有無票回子過往卽報明本城嚴辦並將該管伯克及溫巴什玉孜巴什等分別懲處

硃

是

一回疆雨澤稀少灌溉農田全資水渠之利向來阿奇木及大小伯克等引水澆地只圖自便輒將去路阻遏以致下游回地歉收窮回受累無

已應嚴行示禁嗣後大小伯克耕種地畝如敢
仍前佔據水利許小回子喊控勘實將該伯克
革究

一回子惡習阿奇木訪有伯克及小回子之婦女
年輕有色即可喚往姦佔隨時退出又復另換
伯克之強佔小回子婦女亦復相同實屬淫濫
無耻應嚴行示禁嗣後無論伯克回子已出之
妻未嫁之女兩相情願者准其嫁娶不得恃勢
逼勒如有仍前強佔強娶情事准伯克回子等
首告將違犯之阿奇木及伯克等從重治罪

條

是

一各城流寓十年以外安集延暫准居住仍須隨時查出過犯逐出卡外奏明不准與回子結親若任其婚配則生齒日繁永無驅逐淨盡之期應嚴行示禁嗣後流寓安集延夷人戶口令阿奇木督同專管伯克按月編查將增減人數具報駐劄大臣衙門查考如將所生子女與回子結親婚娶照例斷離治回子以嫁娶違例之罪安集延驅逐出卡如有匿報朦混該管伯克革職失察之阿奇木奏明降一等調用其子女年已及歲情願各回本部落婚娶者准其報明押

送出卡

硃

再議

一回疆各城向有卡外巴達克山等外夷販賣人口與同子爲奴名爲噶爾察各城皆有而葉爾羌爲最多卡內窮回亦間有將人口賣給外夷者查定例各城同子置買外藩人丁久干嚴禁但愚回無知易於干犯若仍前互相售賣恐日久又滋內外勾串之弊應嚴行示禁嗣後卡內回子永不准置買外夷人口爲奴亦不准窮回將子女賣與外夷責成各守卡弁兵認真巡察遇有外夷入卡貿易之時尤當嚴密稽查勿任

硃

卡

是

頂替朦混如查有私買私賣情事將該回子枷責示懲該管伯克降等補用仍追究失察之該班卡弁兵丁分別降革所買外夷人口驅逐出一各城滿城均係專立之城只有官員兵丁居住日久混淆官兵姦宿回婦甚至包佔不自尊重之大員往往亦淫蕩無耻應嚴行示禁嗣後嚴飭阿奇木伯克等通行曉諭不准回婦入城倘敢違犯本城大臣查明將城守營及阿奇木均嚴加議處招引回婦進城之官兵照軍法律治

罪

硃

好

一兵丁有營員管束專事差操其分派巡卡駐堡之兵亦均有分守地界向來兵丁任意出入回莊不加禁約以致姦淫回婦欺凌回子習以爲常殊堪痛恨應嚴行示禁嗣後滿漢兵丁或在城差操或分駐卡堡汎地均有兵房住宿非奉公差_{不准}私人回莊游蕩如有潛赴回莊住宿者准伯克回子縛送大城加重治罪並治該管官以約束不嚴之咎

一營馬出青係屬定例但只准於水草茂盛之處

牧放不得踐食田禾莊稼向來兵丁恃強任意
牧馬糟蹋回田回子畏懼官馬不敢計較工本
虛糜而收成無望窮回隱忍難堪應嚴行示禁
嗣後營馬出青不准踐食回地田禾兵丁任意
牧放該營員查出照律嚴辦或被回子告發該
管官約束不嚴一併處治

硃

一向來各城防兵及游手漢民多有霸佔回子菓

好

園瓜地以所產獲利或於瓜果蔬菜成熟之後
短價強買轉販漁利回子畏其強悍不敢聲張
實爲回莊之害應嚴行示禁嗣後兵民如有仍

前強佔強買情事准回子赴阿奇木衙門首告
阿奇木呈報本城大臣從嚴究辦查係兵丁卽
依軍法從事審係游手漢民照兇惡棍徒治罪

硃

一內地商民向在各城放債重利盤剝窮回三月
轉票利又加利一年之後將其房屋地土錢價
準折償還欠項回子無知受其愚弄應嚴行示
禁嗣後商民借給回子銀錢只准三分有利不
准轉票亦不准將房地賤價抵欠如商民仍前
盤剝該阿奇木查出呈報本城大臣照例治罪

硃

一內地漢民赴回疆覓食傭工向無稽考難保無

內地逃兇逃盜及通緝要犯漏跡其中此等匪人並無身家不顧性命何所不爲應嚴行示禁嗣後內地漢民前赴回疆如無原籍印票註明年貌執業或人票不符者卽行遞解回籍回戶私自容留一體治罪

一內地無業漢回漏跡回疆藉稱同教聘娶回婦爲妻煽惑愚回多方教誘並有充當阿渾之人係屬漢奸現已奏明嚴定科條應嚴行示禁嗣後內地漢回赴回疆貿易傭工者均令在原籍請票出關註明年貌執業照驗行抵名城繳票

註冊回日請票進關使流寓漢回有所稽考如查有擅娶回婦之人卽照新例治罪

以上各條經臣等繕寫回漢告示咨照各城通行曉諭該駐劄大臣隨時認真嚴辦則地方日就整頓而善後益臻周密矣謹

奏

議立茶稅附請設三城銀庫並經管章程

道光八年七月十九日會同叅贊大臣固原提督楊公芳喀什噶爾叅贊大臣武公隆阿

奏爲嚴詰私販便回通商充餉事竊惟上年四城回衆勾結煽惑致亂之由多係商民一切賤買貴賣貪利盤剝回不聊生又兼與外夷各部落交易茶葉等物無所稽查日久熟識勾串俾外夷得知我虛實以致敢於鴟肆查回疆出產足以自給所需者惟茶爲最臣那彥成出關時沿途探訪并行查蘭州涼州等處及口外各城茲據蘭州道稟稱南

北兩路除烏里雅蘇台科布多二城向食北路商
茶伊犁塔爾巴哈台烏什三城向例兵餉搭放茶
封外其餘十二城均係甘司引地歲行官引九千
九百餘道加以帶銷滯引及撥運官茶約計二十
餘萬封向係官商運至涼州發莊聽來往客販轉
運出關隨地銷售又據各城大臣查報南北兩路
歲行附茶通計四五十萬封各等情查官引額銷
年例出關二十餘萬封竟行銷至四五十萬封之
多其爲藉官引行私茶無疑而無引私茶從中影
射亦可概見迨至行銷各城城城增價現在哈密

以西各城每附茶一封值銀一兩七八錢至最遠之喀什噶爾七八兩十餘兩不等此奸商私販勾通外夷剝削回衆輕售重取日甚一日不可不亟亟辦理之實在情形也惟事須持平憑天理卽順人心此次張逆滋事該逆並未曾擾及之處如葉爾羌各臺站回子先將商民搶掠焚殺靡有孑遺此時若竟抑勒商民專意顧卹回衆似亦未得情理之平而任聽增價無已亦必別滋事端查商民在關內置價每附茶一封值銀一兩一二錢運至涼州而止以後則任聽來往客商攜帶售賣藉軍

興爲名高擡價值有增無減利歸私販其弊尙小
至勾結外夷聯絡聲氣其弊滋甚惟有官爲定價
使回衆無食貴之虞則自此回民永感

天恩人心可百年牢固而因有稽查則操縱之權益有
把握臣等時時計及現在新增防兵連舊額防兵
共至一萬餘名所費不貲萬不得已籌及天下兵
額內百分裁二糧餉移以濟用而內地營伍裁而
又裁空虛可慮亦非固本培元之道臣等愚昧之
見總須以回疆之利作回疆之用不值以正項經
費供給邊荒今擬設稅局數處以便稽查向來每

附茶一封價本銀一兩一二錢軍興以前止賣三兩四五錢乃自用兵之後茶價擁貴至各城遞增賣銀七八兩至十餘兩不等今擬每封官爲定價遞減至阿克蘇不得過四兩喀什噶爾葉爾羌不得過五兩作爲永定之價不許增添率算商民每封成本一兩一二錢合計成本運腳二兩五錢每封賣銀四五兩每封運腳一兩二三錢每封獲利二兩五六錢若販至數百封數千封茶愈多利愈厚斷不致累商應請於嘉峪關照殺虎口歸化城張家口等處設稅於阿克蘇照古城設稅喀什噶

爾葉爾羌爲行銷總要之區均亦設稅抽分庶私
販奸民均有稽查回民免於食貴種種流弊可期
盡絕爲此合詞謹奏如蒙

俞允_臣等再行細擬章程另議具奏謹
奏

道光八年八月二十日奉

上諭那彥成等奏嚴禁奸商私販茶葉並設局稽查一
摺甘肅官引額銷茶葉每年例應出關二十餘萬封
近來行銷竟至四五十萬封之多顯係以無引私茶
從中影射其行銷各城又復遞加價值每附茶一封

售銀七八兩至十餘兩不等此等奸商私販勾通外夷剝削同衆不可不嚴行禁絕現據那彥成等酌請每封官爲定價阿克蘇價銀不得過四兩喀什噶爾葉爾羌不得過五兩作爲永定之價不許增添並於嘉峪關地方照殺虎口歸化城張家口等處設立稅局阿克蘇照古城設立稅局喀什噶爾葉爾羌爲行銷總要之區均設立稅局抽分稽查奸商私販以杜流弊俱著照所議辦理其詳細章程著那彥成等另行妥議具奏

道光八年八月初三日會同參贊大臣固原提督

楊公芳略什噶爾叅贊大臣武公隆阿

奏爲借項運茶以濟兵食事竊照回疆西四城現賣
附茶每封市價七八兩至十餘兩不等業經臣等
於議抽茶稅摺內具奏一面照奏定章程先行平
價阿克蘇不得過四兩喀什噶爾葉爾羌不得過
五兩通行出示曉諭回子已無食貴之虞惟據帶
兵各將領面稟留防兵丁所得鹽菜銀兩無幾當
此百物昂貴之時諸已拮据而茶爲日用必需照
市價買食尤形苦累懇求借項自行置買到後一
律抽稅扣餉歸款等情前來查附茶在涼州發莊

每封售銀一兩一二錢沿途遞增運脚至最遠之喀什噶爾合計成本運脚關稅每封不過三兩商販權衡月利及舖面襍費不能不售至四五兩若官爲發賣沿途運脚均給民價並照例投稅每封作價三兩散給兵丁扣餉還款每封可多餘銀二兩邊遠荒苦之地各兵亦得沾潤必當照辦惟喀城並無閒款可動合無仰懇

皇上天恩俯准飭下陝甘督

臣

在於甘肅藩庫借撥經

費銀二萬五千兩

臣

等現已派員前往俟領出銀

兩卽照市價採買附茶一萬封沿途支發運脚回

至喀什噶爾報由叅贊大臣衙門核銷統計西四城滿漢兵丁六千八百餘名按每兵一名准領茶一封半陸續散給臣等預咨葉英等城辦事大臣於運茶經過時照兵數飭留扣餉全完分別補解所借銀兩甘肅藩庫在於道光九年喀什噶爾等四城經費項下全行坐扣以清款項謹

奏

道光八年九月初三日奉

上諭那彥成等奏請借撥銀兩運茶以濟兵食一摺回疆西四城兵丁所需附茶現據那彥成等請於甘肅

藩庫借撥款銀發交派往之員在涼州採買一萬封
每封坐價三兩散給西四城滿漢官兵扣餉還款著
楊遇春卽於甘肅藩庫動撥經費銀二萬五千兩交
喀什噶爾委員妥爲領辦沿途支發運腳由該城叅
贊大臣衙門核銷所借銀兩卽在道光九年喀什噶
爾等四城經費項下全行坐扣以清帑項而濟兵食
道光八年十月初五日會同喀什噶爾叅贊大臣
武公隆阿幫辦大臣蘇公清阿

奏爲酌議回疆抽收茶稅章程事竊臣等前奏奸商
私販茶葉勾通外夷擡價病回請設稅稽查官爲

定價一摺欽奉

上諭現據那彥成等酌請每封官爲定價阿克蘇價銀
不得過四兩喀什噶爾葉爾羌不得過五兩作爲永
定之價不許增添並於嘉峪關地方照殺虎口歸化
城張家口等處設立稅局阿克蘇照古城設立稅局
喀什噶爾葉爾羌爲行銷總要之區均設立稅局抽
分稽查奸商私販以杜流弊俱著照所議辦理其詳
細章程著那彥成等另行妥議具奏欽此伏思臣等
因商販私運茶葉與外夷勾結是以議請設稅稽
查復因商販擡價病同是以議定價值永遠不許

增添若定價過少近於抑勒商民而便外夷且恐
商販賺利無多相率裹足於回食亦有關繫不若
使之獲利寬裕而稅則亦量爲加增稅乃取之於
商回子又復可食賤茶商販獲利稍厚則運茶愈
多稅課愈旺自足供支餉需堪以節省經費方與
詰奸便回通商裕

帑四者相濟爲效茲酌議章程附茶向由蘭州官商
納課運至涼州自涼州以西悉聽襍商販運出關
銷售今擬令各商於涼州買茶時赴涼州道衙門
報明商人姓名茶封數目請領印票有販運襍茶

者亦准一律給票涼州道照票咨明安肅道查核
按月呈報陝甘總督一次至嘉峪關責成安肅道
於關口設稅局委員驗票收稅查附茶一封商販
在涼州置買價銀一兩一二錢販至阿克蘇賣價
四兩至喀葉兩城卽賣至五兩統計商販成本脚
價至阿克蘇每封合銀一兩八九錢至喀葉兩城
每封合銀二兩一二錢除上稅外在阿克蘇每封
獲利一兩五六錢至喀葉兩城每封獲利約二兩
餘推之百封千封萬封其利甚厚該商等在內地
行銷不能如此獲利自必踴躍前來將來回疆茶

多其價自減於同民更有裨益應將嘉峪關稅則
定爲每附茶一封重五觔納稅銀三錢襍茶每五
觔納稅銀三錢各商於上稅後繳銷涼州道印票
另請安肅道印票仍註明商人姓名茶封數目及
運赴何城銷售安肅道照票分咨該商所往之城
照驗按月咨報伊犁將軍烏魯木齊都統喀什噶
爾叅贊大臣葉爾羌阿克蘇辦事大臣陝甘總督
查考所收稅銀按月報院咨司查核又襍茶由殺
虎口歸化城出口聚集古城商販於古城納稅後
將運赴南路行銷各種襍茶卽於稅局請領印票

註明商人姓名茶色觔數及運赴何城銷售稅局
給票後報明鎮迪道咨呈阿克蘇辦事大臣及喀
什噶爾叅贊大臣葉爾羌辦事大臣查照仍按月
呈報烏魯木齊都統陝甘總督一次阿克蘇爲附
襍茶總滙之區擬於該城設稅局查各商販至阿
克蘇每封賣銀四五兩今官爲定價不得過四兩
商利倍於成本亦應徵稅銀三錢襍茶五觔作附
茶一封納稅各商原領嘉峪關古城兩處印票均
在該城繳銷其轉運烏什及西四城行銷附襍各
茶令其報明阿克蘇辦事大臣給予印票亦註明

商人姓名茶色數目及運赴何城銷售一面咨照各城大臣照驗其葉爾羌喀什噶爾二城均係接壤外夷處處有開齊小路設有偷漏尤關緊要擬每城設落地稅查阿克蘇附茶官爲定價不得過四兩喀葉二城官爲定價不得過五兩計加增運腳不過二錢商販多獲利息八錢應定爲每附茶一封襍茶五觔均徵收稅銀二錢阿克蘇葉爾羌二城將收過稅課按月咨明陝甘總督喀什噶爾參贊大臣查照喀什噶爾所收稅銀亦按月咨明陝甘總督查照每屆年終喀什噶爾參贊大臣將

本城及阿克蘇葉爾羌二城一年所收稅銀具奏
一次陝甘總督將安肅道所收稅銀及喀什噶爾
阿克蘇葉爾羌咨報收過稅銀數目彙奏一次各
稅局仍照例造冊奏銷安肅道所管稅務照各省
鈔關督撫委巡道監收之例由陝甘總督經管辦
理如各稅局查無原領印票或茶色數目與印票
不符均以私茶論入官充公仍治私販之罪如巡
攔兵役有藉端留難勒索賣放情弊該管大臣查
出或被商販告發各照本例從嚴治罪該管大臣
如有隱匿稅課照侵盜錢糧例治罪嘉峪關古城

兩處印票至阿克蘇驗銷并各商指明赴哈密吐魯番喀喇沙爾庫車等城行銷之票亦令呈繳各城大臣衙門一律截角咨回各原衙門查對所換阿克蘇印票俟各商運赴何城銷完之後呈繳該城大臣衙門彙齊每年年終截角咨銷如奉

旨允准令涼州道暨關內外各稅局遵照章程逐條出示曉諭務使周知以免干犯禁令惟是南路設稅稽查已臻周密自不致再有偷漏出卡之弊恐商販惟利是圖避匿稅課勢必改由伊犁出卡則南路徒有設稅之名而奸商仍可繞路出卡交接外

夷亦屬無益烏魯木齊亦應設稅局一處凡附襍
茶到境照阿克蘇稅則一律抽稅伊犁本城照喀
葉二城抽收落地稅如此兩路稽查奸商不至出
卡私販似爲周備但西路情形是否與南路相同
如何辦理之處應請

飭下伊犁將軍烏魯木齊都統體察情形妥議奏辦其
庫車之沙雅爾阿克蘇之渾巴什河均有通和闕
等處捷徑此外或另有小路岔道堪以繞越稅局
之處應令各城大臣查明派兵設卡稽查嚴防偷
漏以期周密謹

奏

道光八年十一月初七日奉

上諭那彥成等奏酌議回疆抽收茶稅章程一摺前據
那彥成等以奸商私販茶葉勾通外夷奏准設局稽
查官爲定價並聲明詳細章程另行妥議具奏茲據
奏各商買茶應請領印票並酌定稅則及應添稅局
稽查之處均著照所請行惟南路設局稽查周密恐
商販惟利是圖改由伊犁繞道出卡致有交接外夷
之弊那彥成等請於伊犁本城照喀什噶爾葉爾羌
二城抽稅烏魯木齊照阿克蘇稅則抽收兩路稽查

庶奸商不至私販出卡應如何辦理之處著伊犁將軍烏魯木齊都統體察情形妥議具奏其庫車之沙雅爾阿克蘇之渾巴什河均有通和闌等處捷徑此外或另有小路岔道可以繞越稅局之處並著各該城大臣查明設卡派兵稽查以杜偷漏其餘詳細章程俱著照所議辦理

道光八年十月初五日會同喀什噶爾參贊大臣武公隆阿幫辦大臣蘇公清阿

奏爲請設喀什噶爾葉爾羌阿克蘇等三城銀庫並按例嚴定官吏經管章程以重

帑項事竊查

臣

等前議抽茶稅業經欽奉

諭旨准行在案約計南路八城回民食茶至少二十餘萬封每附茶一封五觔襍茶以五觔准附茶一封自嘉峪關至阿克蘇抽稅六錢到喀什噶爾售賣者抽落地稅二錢到葉爾羌售賣者抽落地稅二錢合計喀什噶爾葉爾羌阿克蘇等三城共四處抽稅每封計稅銀八錢以最少約計二十萬封茶卽應收稅銀十餘萬兩而襍茶仍不在此數再加以卡外准通貿易其如何交易雖定有章程而價值之高下未便官爲抑勒商民而便外夷則於十

餘萬兩之外有增無減如果辦理妥善統計每歲
可得銀二三十萬兩惟各城存貯既多聽其散漫
無稽日久不肖官吏漸生侵盜必致釀成巨案竊
恐非

聖明准設茶稅惠商便民充餉詰奸之本意立法之始
惟有嚴定章程使層層有所稽查鈐制自自然人知
畏法不至舞弊侵肥再生巨案查內地州縣府道
有經營錢糧之責者定制皆設庫房額設庫官庫
吏專司出入查記簿籍以杜侵虧挪移除嘉峪關
歲收稅課聽陝甘督臣督飭安肅道在於道庫收

貯無庸議設官吏外查喀什噶爾葉爾羌阿克蘇等三城舊時雖有銀庫所有出入止於歲例俸餉旋收旋放並無存貯今庫貯既多自應立庫及增添官吏監守方爲周備應請於各大臣衙署內各設銀庫一所專派掌印司員經理毋庸另請

簡派司員以節冗食其書吏一項口外各衙門經書向來俱於換防營書內挑補所有新設書吏應聽各大臣在於換防營兵內擇其謹飭老實通曉文義者四人充膺庫吏專管登記簿籍辦理一切有關庫項文移案件所需工食銀兩照例支給作正開

銷每城定爲額設庫吏經承二缺貼寫二缺均照內地成例查例載監守自盜倉庫錢糧不分首從併贓論罪四十兩以上擬斬又錢糧官吏互相覺察若知侵欺盜用借貸係官錢糧匿而不舉及故縱者並與犯人同罪又上司逼勒所屬挪移庫銀照貪官例治罪等語如大臣中有挪移庫項情事准章京等援例阻止倘敢故違

功令准章京庫吏揭報照上司逼勒所屬挪移庫項之例治罪匿而不舉者同罪章京與庫吏通同舞弊虧短錢糧該管大臣查出照監守自盜不分首

從併贓論罪章京舞弊庫吏據實首舉庫吏舞弊
章京據實查報各照監守自盜本例辦理知情不
舉照故縱例治罪如此嚴定科條大臣及章京庫
吏人等互有考核於庫項實爲有裨但繩以重法
若不優予進身之階亦不足以示勸懲而昭平允
應請將管庫章京於經管三年期滿由該管大臣
查明庫貯一無弊混咨部議敘庫吏五年役滿考
取典吏一名咨部銓選查回疆各城額設書吏道
光四年吏部奏定章程五年役滿仍歸雙月外用
班七缺之後選用初次留班期滿仍歸雙月陞選

十缺之後選用至初次留班期滿後如實因辦事
乏人准其再留二年俟二次留班期滿統歸一班
毋論是否積缺一併計算四缺之後選用一人等
語今添設庫吏事同一例並請循照向例辦理庶
庫官庫吏知有勸懲自當益加慎重至各該大臣
每遇遷轉更調務當詳晰造具舊管新收開除實
在四柱清冊交代新任歸新任大臣具奏司員班
滿亦須造具清冊交代接手司員由本城大臣造
冊咨部查核倘該大臣司員等有別項事故實任
之人尙未到任整署之人亦應將庫官冊據查明

分別具奏如有造報不實暨瞻顧情而匿不奏報者查出從重辦理如此明定科條弊端可除免生巨案謹

奏

道光八年十一月初七日奉

上諭那彥成等奏請設喀什噶爾等三城銀庫並按例嚴定經管章程一摺回疆南路八城每歲食茶至少二十餘萬封每附茶一封五觔襍茶以五觔准附茶一封自嘉峪關至阿克蘇及葉爾羌等三城共四處抽收稅課請於各該三城設立銀庫以昭慎重著照

所請准其於喀什噶爾葉爾羌阿克蘇三城大臣衙署內各設銀庫一所專派掌印司員經理應設書吏著各該大臣於換防營兵內選擇每城定爲額設庫吏經承二名貼寫二缺專管並一切有關庫項文案所需工食銀兩准其照例支給作正開銷惟是各城庫貯既多若不嚴定章程必致日久弊生致滋侵蝕嗣後各城庫項如大臣中有挪移情事准章京等援例阻止倘敢違功令准章京庫吏揭報照上司通勒所屬挪移庫項之例治罪匿而不舉者同罪章京與庫吏通同舞弊虧短錢糧照監守自盜不分首從

併賊論罪章京與庫吏舞弊互相舉報各照監守自盜本例辦理知情不舉者照故縱例治罪各該大臣及章京人等務當奉公守法認真妥辦其管庫章京三年期滿由該管大臣查明庫項一無弊混准其咨部議敘庫吏五年役滿考取典吏一名准其咨部銓選照回疆各城額設書吏道光四年吏部奏定章程一律辦理俾知懲勸再各該大臣每遇遷轉更調當造具清冊交代新任歸新任大臣具奏司員班滿亦造具清冊交代接手司員由本城大臣造冊咨部查核倘該大臣司員尚未到任暫署之人亦應將庫官

冊據查報分別具奏如有奏報不實及匿不奏報者
查出從重辦理該部知道

道光九年正月十二日會同喀什噶爾叅贊大臣
武公隆阿

奏爲酌議回疆行茶規條奏明交部立案以憑畫一
遵循事竊臣議抽回疆茶稅詎奸便回通商裕

帑欽奉

諭旨准行經臣等會議章程具奏復奉

上諭俱著照所議辦理欽此當卽咨移各城並陝甘總
督伊犁將軍烏魯木齊都統一體欽遵辦理去後

復查

臣

等前奏關內外稽查抽稅章程聲明奉

旨允准令涼州道暨關內外各稅局遵照逐條出示曉諭務使周知以免商販干犯禁令等因茲當設局徵稅之始若由各該處隨意摘敘原奏分別示諭誠恐文義叅差商販初次試行不能盡一遵守籌畫尙未周密且杜弊便商立法不厭精詳茲臣等復加體察謹將原奏所未及並有將前奏章程悉心推廣繕列規例十四條咨行陝甘總督甘肅藩司蘭州道甘涼安肅兩道伊犁塔爾巴哈台烏魯木齊及阿克蘇葉爾羌英吉沙爾和闐四城並於

喀什噶爾照繕多張通行曉諭俾關內外官吏商
回事事均有所恪遵不致稍有歧誤第非奏明

勅部立案將來部中無憑稽核更恐日久變更轉滋弊
竇自應將現行詳細條款分晰開列恭呈

御覽並請

勅部備案

一查軍興以來西四城茶價增昂每附茶一封價
銀六七兩十餘兩不等茲奏准官爲定價在阿
克蘇行銷者每封不得過四兩運至西四城行
銷者不得過五兩誠爲便商而不病回該商民

等如敢增價售賣卽行究辦倘有意減價攪混行市亦當禁止總須遵照奏定價值售賣違者茶罰入官仍治以應得之罪

一茶商自涼州販運應赴甘涼道衙門請票註明茶封數目及該商販姓名隨時咨明安肅道並呈報總督咨照藩臬蘭州道各衙門該商等持票赴安肅道衙門照驗換票放行如無甘涼道印票概不准出關卽與私販無異茶罰入官仍照偷漏例治罪

一茶販持票運至肅州安肅道照票抽稅卽將原

持之甘涼道印票繳銷換給安肅道印票註明
何商何茶將封數觔重裝用車駝若干運赴何
城銷售一一開載票內如運赴哈密吐魯番喀
喇沙爾庫車等城落地者卽註明何城銷售字
樣一面咨呈該城大臣照驗

一襍茶向不出嘉峪關均由殺虎口張家口及歸
化城一帶運往北路至古城聚集由烏魯木齊
運赴南路其赴南路者應令該商販赴鎮迪道
衙門請票註明茶色觔重數目及商販姓名按
起咨呈阿克蘇辦事大臣照驗一面呈報烏魯

一出關行銷各城茶商赴北路者業已咨明烏魯木齊都統伊犁將軍等處辦理其運赴南路者如哈密吐魯番兩城回戶食茶有限未便定收落地稅其喀喇沙爾庫車二城不過商販過往之區烏什僻在一隅均未便議稅惟阿克蘇爲附茶襍茶總匯之地商販雲集現已奏准設局照嘉峪關稅則每附茶一封重五觔抽稅三錢襍茶五觔准附茶一封抽稅三錢其由嘉峪關運至者應驗明安肅道印票抽收其由烏魯木齊運至者應驗明鎮迪道印票抽收收稅後將

該二處印票查銷截角咨回該二道衙門備照如無該二道印票照私販偷漏例茶罰入官仍照例治罪至運赴西四城之茶應換給阿克蘇大臣印票註明茶色封數觔重及商販姓名前往行銷只准請領喀什噶爾葉爾羌兩城印票一面咨照該二城大臣查照如有賣放侵蝕致虧課稅均罰令該大臣賠繳仍交部議處該管司員如有弊混聽該大臣嚴參

一自阿克蘇運赴西四城之茶除英吉沙爾爲喀什噶爾屬城和闐爲葉爾羌屬城該二城毋庸

設局徵稅外西四城回戶衆多又兼卡外夷商雲集該商民獲利倍徙應照奏定章程於喀什噶爾設立稅局每附茶一封抽落地稅二錢襍茶五觔抽落地稅二錢葉爾羌設立稅局每附茶一封抽落地稅二錢襍茶五觔抽落地稅二錢查附襍各茶運赴西四城者總須由阿克蘇經過其赴喀什噶爾者捷徑則由樹窩子行走大路則由葉爾羌行走其由樹窩子行走者應令商民呈明阿克蘇大臣請票註明經行程站仍咨呈參贊大臣按封戳印圖記照票抽稅儻

有由喀什噶爾赴英吉沙爾售賣者該商報明英吉沙爾大臣驗明喀什噶爾圖記方准售賣如無圖印茶在市行銷致虧課稅均罰令該城大臣賠繳葉爾羌管稅司員如有弊混或格外私自抑勒商民聽商民赴控從嚴叅辦

一現經奏准嘉峪關抽稅三錢應徵稅課行文陝甘總督卽飭安肅道在於道庫存貯外其烏魯木齊都統伊犁將軍等處亦應將奏准設稅緣由抄錄原奏及奉到

諭旨聽其自行議奏辦理至喀什噶爾阿克蘇葉爾羌

等三城均設稅局自應設庫存貯應照奏定設
庫並添設庫官吏及如何互相稽核章程辦理
由各城遇便具奏報部以憑查核

一查嘉峪關至喀喇沙爾三城均無別路可以繞
越惟喀喇沙爾所屬之庫爾勒向有小路沿山
行走直通喀什噶爾所屬之伊勒古楚卡倫庫
車所屬之沙雅爾有赴和闐捷徑阿克蘇所屬
之渾巴什河向東有通和闐大路此三處應派
員築卡駐查以防偷越

一嘉峪關所收稅銀每月由安肅道據實稟報陝

甘總督咨明喀什噶爾叅贊阿克蘇葉爾羌所
收稅銀每月由該二城大臣咨報叅贊叅贊衙
門將本城及葉爾羌阿克蘇等三城共收稅課
若干咨明陝甘總督每年終由陝督具奏一次
由喀什噶爾叅贊具奏一次每年終統算徵收
稅銀若干如徵若干萬次年防兵餉銀少撥若
千萬出關此項稅課卽作爲防兵餉需作正開
銷應由陝督及喀什噶爾叅贊彙總報部以憑
考核

一既設稅局管稅管庫官吏應需飯食心紅等費

斷不可少擬照內地各關稅加平耗解費飯食
心紅等費按每百兩加平飯銀四兩作爲襍項
費用既經官定之後如有例外需索一經查出
從重治罪

一每附茶一封自涼州起行責成甘涼道按封截
印圖記至肅州安肅道驗明上稅查無涼州圖
記不准出關接封上稅後仍每封加用安肅道
圖記至哈密令該商等報明哈密廳販至南路
者何商茶若干封販至北路者何商茶若干封
一面行文安肅道鎮迪道查核並稟報本城大

臣轉咨阿克蘇大臣備查其有運至吐魯番喀喇沙爾庫車等三城售賣者均在哈密廳報明由哈密大臣咨明吐魯番喀喇沙爾庫車等三城大臣何商運茶若干封認赴何城售賣其商人至所認之城不准私賣須先報明本城大臣按封加用本城圖記方准售賣如既印有本城圖記仍赴別城銷售者原所不禁但須報明本城大臣將運赴別城行銷之處轉咨別城大臣亦應加印圖記方准銷售至哈密吐魯番喀喇沙爾庫車等四城祇司稽查不必抽稅以免擾

累

一商人等無不意圖避稅甚至附襍各茶運至阿克蘇以東各城恃有各城印記原准售賣竟將所運之官印各茶賣與東四城回子既可避阿克蘇以西各稅局盤查仍可賤售速銷以圖便利回子賤買運赴西四城貴賣勢所必有於稅局甚有關礙應查明無論商民回子運茶至阿克蘇暨運往西四城者一體收稅稽查庶無遺漏之弊

一查卡內回衆向食附茶襍茶一項爲卡外夷商

必需現在奏准每襍茶五觔准附茶一封俱定
價銀五兩查原奏內定價專指卡內各城而言
至卡外通商所用襍茶最多官未定價抑勒
商民而便外夷亦奏准在案是將來襍茶獲利
倍於附茶而襍茶之銷售亦暢於附茶查襍茶
俱在古城聚集分赴南北兩路行銷現已奏奉
諭旨令伊犁將軍烏魯木齊都統體察情形妥議具奏
欽此欽遵在案應俟伊犁烏魯木齊奏准之日
再行照例抽稅此時應先責成鎮迪道按包按
窰戳印圖記給子印票始准運赴各城行銷一

切稽查章程及赴南路八城抽稅等事照附茶
一律辦理如阿克蘇查有襍茶到境既無戳記
又無印票茶罰入官照私販治罪仍將鎮迪道
咨送陝甘總督照例叅辦

以上各條自涼州以至喀什噶爾關內外節節
防維自可不致私販偷漏各稅局遵照奉行均
有一定準則商民亦無苦累茶價既定回子永
無食貴之虞現在各外夷如布噶爾巴達克山
均已陸續前來貿易茶更易於銷售銷茶愈多
稅課愈旺將來商販雲集其價自減於兵回更

有裨益謹

奏

道光九年二月十四日奉

上諭那彥成等奏酌議回疆行茶規條一摺著交該部核議具奏

容安謹按戶部議覆以邊要事宜籌畫更當詳慎開闢新疆六十餘年並未設立茶稅該處是否相宜未敢懸擬恐將來或有窒礙請

旨簡派熟悉新疆情形大員會同悉心覆議當奉

旨著派托津長齡富俊會同戶部悉心核議具奏復經

議奏以該處甫議徵稅卽慮商人藉詞擡價居
高兵民缺食復請借餉置買茶觔藉資接濟可
見徵收茶稅在商人固非所樂從於兵民亦諸
多未便現在收稅一節以事屬難行未經議准
是商人亦無可藉詞擡價其請借餉置茶以資
接濟之處應毋庸議又以開闢新疆六十餘年
商民輻輳久經樂業相安茲當重定回城尤宜
加意撫綏培養自應仍照舊章無須另議所稱
茶商出口以後往來售賣無可稽查甚至交通
外夷必須嚴行查禁相應請

旨飭下各城將軍叅贊辦事領隊各大臣等轉飭坐卡官兵認真稽查如有潛通外夷卽行查拏究辦
道光九年三月二十二日奉

旨依議

郭文毅公籌畫回疆善後事宜奏議卷七十七